



Sumáriu Kazu

Tribunál Judisiál Primeira Instáncia Baukau

Juñu 2023

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 32

Artigu	Tipu Kazu	Númeru
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	14
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD), artigu 157 KP	Ofensa ba integridade física simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku) no ameasa	2
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD) no Artigu 20 (1), artigu 2 (2 alinea f) Lei Arma Brankas	Ofensa ba integridade física simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira	1

	violéncia doméstika nian hanesan krime públiku) no arma brankas	
Artigu 154 (KP) & artigu 2, 3, no 35 letra (b) (LKVD)	Maus-tratus ba kónjuje kontekstu violéncia doméstika	3
Artigu 172 KP & 173 nº 1 (d) KP	Viloasaun seksuál	1
Artigu 217 KP artigu 24 Lei n 14/2017 no artigu 30 no 31 Dekretu Lei n 6/2020	Hasoru flora no fauna	1
Artigu 217 KP artigu 24 Lei n 14/2017 no artigu 30, artigu 31 Dekretu Lei n 6/2020 & Artigu 20 (1), artigu 2 (2 alinea f) Lei Arma Brankas	Hasoru flora no fauna no arma brankas	1
Artigu 177 (2) KP	Abuzu seksuál ba menór	1
Artigu 20 (1), artigu 2 (2 alinea f) Lei Arma Brankas no artigu 258 KP	Arma Brankas no danu simples	1
Artigu 258 KP	Danu simples	1
Artigu 145 (KP)	Ofensa ba integridade fizika simples	1
Artigu 207 KP	Kondusaun sein karta	1
Artigu 259 (a) KP	Danu agravadu	2
Artigu 157 KP	Ameasa	1
Artigu 138 KP ho artigu 24 KP, artigu 258(1) KP no artigu 20 (1), artigu 2 (2 alinea f) Lei Arma Brankas	Omisídiu simples ho forma tentada, danu simples no arma Brankas	1
Totál		32

2. Totál desizaun ne'ebé JSMP monitoriza: 11

Tipu desizaun	Artigu	Númeru
Pena prizaun ho indeminizasaun sivíl	Artigu 66 KP	1
Pena prizaun	Artigu 66 KP	1
Suspensaun ba prizaun nia ezekusaun	Artigu 68 KP	2

Suspensaun ba prizaun nia ezekusaun no omologa dezistensia keisa	Artigu 68 KP	1
Pena multa	Artigu 67 KP	5
Pena multa no omolga dezistensia keisa	Artigu 67	1
Totál		11

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 21

B. Deskrisaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0007/23. MNLAL

Kompozisaun Tribunál : Singulár

Juís : Dra. Maria Modesta d. A. Viera

Prokuradór : Dr. Ambrosio Rangel Freitas

Defeza : Dr. Albino de Jesus Perreira

Desizaun : Pena multa US\$45.00

Iha 01 Juñu 2023 Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade física simples natureza violénsia doméstika ne'ebé envolve arguidu DVNS hasoru nia feen, iha Munisípiu Manatuto.

Akuzasaun Prokuradór

Prokuradór akuza katak Iha 11 Marsu 2023 iha oras tuku 15:00 lokraik arguiduza pasta tuda dala ida kona iha lezada nia kotuk laran, tuku dala ida iha kotuk laran, tuku dala ida iha ulun, tuku dala ida iha matan parte loos no buti kakorok riba ba rai nune'e lezada mós hirus foti fatuk tuda arguidu. Antes ne'e lezada foti arguidu nia osan iha arguidu nia pasta hodi soda modo, arguidu hirus no halo agresaun hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa kónjuga ho artigu 2, 3, 35(b) LKVD.

Produsaun ba prova sira

Iha prosesu julgamentu, arguidu deklara faktu sira iha akuzasaun ne'e loos hotu, iha eskuadra Polísia Laleia sira di'ak malu kedas no fila hamutuk ba uma moris hamutuk nafatin to'o agora, la baku ona lezada, arrepende ninia hahalok, foin primeiravés mai hatan iha tribunál no serbisu nu'udar agrikultór rezultadu hodi sustenta de'it ba família.

Alende ne'e, lezada konfirma faktu sira iha akuzasaun, bainhira arguidu fila husi eskuadra Polísia sira di'ak malu kedas no to'o agora arguidu la baku ona lezada.

Alegasaun finál

Prokuradór haktuir katak akuzasaun prokuradór prosedente provadu bazeia ba arguidu nia deklarasaun no lezada nia konfirmasaun ba akuzasun. Tanba ne'e husu ba tribunál atu aplika pena multa US\$60.00 ba arguidu.

Entretantu defeza haktuir katak arguidu konfesa faktu sira iha akuzasaun sira di'ak malu kedas bainhira arguidu fila husi Polísia, arrepende ninia hahalok no foin primeiravés mai hatan iha tribunál. Haree ba arguidu nia kondisaun rendementu la fiksi nune'e husu ba tribunál atu fó pena suspensaun ba arguidu.

Desizaun

Depoisde avalia faktu sira hotu, tribunál prova katak arguidu komete krime hasoru lezada, arguidu uza pasta tuda dala ida iha lezada nia kotuk laran, tuku dala ida iha kotuk laran, tuku dala ida iha ulun, tuku dala ida matan parte loos no buti lezada nia kakorok riba ba rai.

Bazeia ba faktu provadu sira ne'e no tetu mós sirkunstánsia atenuante sira hanesan foin primeiravés mai hatan iha tribunál, di'ak malu ona, arrepende ninia hahalok nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu sentavus 0,50 kada lora durante lora 90. Tribunál mós fiksa pena alternativa ba arguidu durante lora 60 prizaun, bainhira arguidu la kumpra pena multa refere.

2. Krime ofensa ba integridade física simples ho natureza violência doméstica

Nú. Prosesu : 0165/22. BCBCV
Kompozisaun Tribunál : Singulár
Juís : Dra. Maria Modesta d. A. Viera
Prokuradór : Dr. Ambrosio Rangel Freitas
Defeza : Dr. Germano Guterres Ramos
Desizaun : Pena multa US\$45.00

Iha 05 Juñu 2023 Tribunál Judisiál Primeira Instánsia Baukau prezide Julgamentu leitura sentensa ba krime ofensa ba integridade física simples natureza violência doméstica ne'ebé envolve arguidu AVV (aman) hasoru nia nia oan ho idade tinan 5, iha Munisípiu Baukau.

Akuzasaun Prokuradór

Prokuradór akuza katak Iha 14 Novembru 2022 iha oras tuku 02:00 madrugada lezada tanis tuir nia inan nune'e arguidu hamaus tanba lezada la nonok arguidu lori save motor baku iha lezada nia liman kabun rezulta kanek.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa kónjuga ho artigu 2 nú 2(a), 3(c), 35(b) LKVD.

Produsaun ba prova sira

Iha prosesu julgamentu, arguidu deklara katak momentu ne'e arguidu nia feen moras hela (moras mental) no momentu ne'e atu halo tuir nia moras, derepente arguidu nia feen ba Polisia nnune'e Polisia sira tula fali arguidu nia feen mai uma no lezada mós tanis hela no Polisia haree no hatete ba arguidu dehan husik labarik hamfoin arguidu husik lezada ba Polisia maibé arguidu la baku lezada. Iha loron tuir fali mai, Polisia kontaktu arguidu hodi ba presta deklarasaun maibé arguidu nafatin deklara katak la baku lezada.

Alende ne'e, lezada menór deklara katak tanba nia tanis tuir nia inan ne'e mak arguidu foti save motor baku dala ida iha lezada nia liman kabun, depoisde akontese arguidu la baku ona lezada.

Alegasaun finál

Prokuradór haktuir katak iha produsaun prova mezmú arguidu nega faktú maibé lezada ho idade menór konfirma katak arguidu uza save motor baku dala ida iha liman kabun tanba de'it lezada tanis tuir nia inan. Prokuradór la iha duvida nafatin tau krebilidade ba lezada nia deklarasaun. Tanba ne'e husu ba tribunál kondena arguidu ba pena multa US\$60.00 ba arguidu

Entretantu defeza akresenta katak bazeia ba produsaun prova ne'ebé prodús iha audénsia julgamentu, husu ba tribunál atu aplika pena maiz adekúadu ba arguidu.

Desizaun

Depoisde avalia faktú sira hotu, tribunál konsidera liu lezada nia deklarasaun no prova katak arguidu lori save motor baku iha lezada nia liman kabun rezulta kanek.

Bazeia ba faktú provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu sentavus 0,50 kada loron durante loron 90. Tribunál mós fiksa pena alternativa ba arguidu durante loron 60 prizaun, bainhira arguidu la kumpri pena multa refere.

3. Krime ofensa ba integridade fizika simples ho natutrezza violénsia doméstika

Nú. Prosesu	: 0004/23. BCQLC
Kompozisaun Tribunál	: Singulár
Juíis	: Dra. Sribuana da Costa
Prokuradór	: Dr. Julio da Silva Correia
Defeza	: Dr. Antonio Fernandes
Desizaun	: Pena prizaun fulan 2 suspende ba tinan 1

Iha 12 Juñu 2023 Tribunál Judisiál Primeira Instánsia Baukau prezide julgamentu leitura sentensa ba kazu ofensa ba integridade fizika simples ho natutrezza violénsia doméstika ne'ebé envolve arguidu MVXB hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha, lora, fulan haluha maibé iha tinan 2022 arguidu basa dala ida iha lezada nia kanuruk rezulta moras no bubu maibé lezada la prezenta keisa. Antes ne'elezada haruka arguidu fóharis labarik maibé arguidu lakohi. Iha 25 Feveireiru 2023 iha oras tuku 15:00 lokraik arguidu ho kondisaun lanu basa dala ida iha lezada nia kanuruk no tuku dala ida iha lezada nia ren-toos..

Prokuradór akuza arguidu konkursu krime rua kontra artigu 145 KP kona-ba ofensa ba integridade fizika simples ho natutreza violénsia doméstika ho moldura penál to'o tinan 3 ka multa, artigu 52 (2 l) KP kona-ba sirkunatsia agravante jerál no artigu 35 (1) KP kona-ba krime iha konkursu kónjuga ho artigu 2 (a), 3 (b) no 35 (b) husiLKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontese arguidu ho lezada di'ak malu kedas, arrepende ninia hahalok, foin primeiravés mai hatan iha tribunál no serbisu nu'udar agrikultór rezultadu sustenta de'it ba família.

Entretantu lezada konfirma faktu hotu iha akuzasaun, akontese ikus lezada ba hela iha uma mahon durante semana tolu no depoisde lezada fila husi uma mahon perante família rua sira di'ak malu no kedas to'o agora arguidu la baku ona lezada.

Alegasaun finál

Prokuradór haktuir katak akuzasaun prokuradór prosedente provadu katak arguidu komete konkursu krime hasoru lezada nu'udar nia feen tuir loloos arguidu mak proteze lezada maibé kontrariu arguidu mak halo fali agresaun hasoru lezada. Tanba ne'e husu ba tribunál atu kondena arguidu ho pena únika tinan ida suspende ba tinan ida.

Enkuantu defeza haktuir katak bazeia ba produsaun prova arguidu konfesa no arrepende ba ninia hahalok, di'ak malu ona ho lezada, to'o agora moris hamutuk nafain nu'udar feen ho la'en no la baku ona lezada. Tanba ne'e husu ba tribunál fó pena ne'ebé maiz adekua ba arguidu hodi garantia ba futuru atu labele baku tán lezada ho membru família sira seluk.

Desizaun

Depoisde avalia faktu sira hotu, tribunál prova arguidu komete konkursu krime rua hanesan iha iha akuzasaun prokuradór nian.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

4. Krime arma Brankas no danu simples

Nú. Prosesu : 0047/20. VQWTL

Kompozisaun Tribunál : Koletivu
Juís : José António d. Escurial, Dr. José Q.S.Celestino no Dra. Jumiaty Maria Freitas
Prokuradór : Dr. Julio da Silva Correia
Defeza : Dr. Germano Guterres Ramos
Desizaun : Pena prizaun tinan 3 suspende ba tinan 3 no omologadezistencia keixa

Iha 14 Juñu 2023 Tribunál Judisiál Primeira InstánsiaBaukau prezide julgamentu leitura akordaun ba kazu arma brankas no danu simples ne'ebé envolve arguidu Aniceto Rodrigues de Carvalho, Jeca da Silva no Manuel Lopes hasoru Afonso Lopes Saldanha no Estado RDTL, iha suku Afalokai postu admistrativu Uatulari Munisípiu Vikeke.

Akuzasaun Prokuradór

Prokuradór akuza katak iha 04 Outubru 2023 iha oras tuku 15:00 lokraik testemuña Afonso Lopes Saldanha nia feen iha nia uma haree arguidu foti katana husi testemuña Roza nia liman hodi taa uma nia ai-rin nune'e uma refere tohar hanehan no estraga sasan sira iha uma laran.

Prokuradór akuza arguidu Aniceto Rodrigues de Carvalho kontra artigu 258 KP kona- ba danu simples no artigu 20 nú 1, 2. nú 2 (c) husi Lei nú.5/2017 kona-ba lei arma brankas. Arguidu Jeca da Silva no arguidu Manuel Lopes kontra artigu 258 KP kona-ba danu simples ho moldura penál tinan 3 ka multa.

Antes tama iha produsaun ba prova sira, bazeia ba artigu 262 KPP kona-ba tentativa konsiliaun. Tribunál halo konsiliaun ba arguidu nain tolu relasiona ho krime danu simples tanba kazu ne'e klasifika nu'udar krime semi- públiku no nia prosedimentu depende ba keixa.

Iha proseseu konsiliaun ne'e, lezadu hakarak deziste nia keisa hasoru arguidu nain tolu. Bazeia ba konkordansia husi parte rua ne'e, tribunál omologa tiha keisa ne'e. Enkuantu arguidu Aniceto Rodrigues de Carvalho komete krime armas brankas tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu deklara katak nia haree Sr. Afonso Lopes Saldanha fakar fatuk iha nia rai laran no estraga hotu sira plantasaun ne'e mak arguidu hirus, bainhira Sra. Roza fila husi hree karau no kaer mós katana ida, arguidu foti katana refere hodi taa uma nia ai-rin, arrepende ninia hahalok, foin primeiravés mai hatan iha tribunál no arguidu nu'udar xefe aldeia kada fulan hetan subsidiu US\$150.00.

Prokuradór husu ba tribunál atu presinde tiha testemuña sira tanba arguidu konfesa faktu hotu iha akuzasaun nune'e tribunál simu pedidu no presinde testemuña.

Alegasaun finál

Prokuradór haktuir katak iha produsaun prova arguidu konfesa faktu sira hotu, arguidu transforma katana nia funsaun hodi komete krime. Tanba ne'e husu ba tribunál kondena arguidu ho pena mínimu husi krime ne'e suspende ba período hanesan.

Enkuantu defeza haktuir katak bazeia ba produsaun prova arguidu nia hahalok la fó ameasa ba ema ruma no katana ne'ebé nia uza ho rezulta mak estraga ai-rin no sasan sira maibé sasan estragu sira deziste ona. Tanba ne'e husu ba tribunál atu absolve arguidu husi prosesu.

Desizaun

Depoide avalia faktu sira hotu, tribunál prova katak arguidu foti katana husi testemuña Roza nia liman hodi taa uma nia ai-rin.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

5. Krime abuzu seksuál ba menór

Nu. prosesu : 0070/21. BCBCV
Kompozisaun Tribunál : Koletivu
Juís : Dr. Evangelino Belo, Dra.Sribuana da Costa no
Dra. Maria Modesta d. A. Viera
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena prizaun tinan 7 no selu indeminzasaun sivil ba lezada ho valór osan US\$2000.00.

Iha 16 Juñu 2023 Tribunál Judisiál Primeira Instánsia Baukau Prezide julgamentu leitura akordaun ba kazu abuzu seksuál ba menór, ne'ebé envolve arguido JAdS hasoru lezada ho idade tinan 12 iha Munisípiu Baukau.

Akuzasaun Prokuradór

Prokuradór akuza katak loron haluha maibé iha Jullu 2020 oras la lembra , iha momentu ne'e lezada nia inan-aman ba tiha natar arguidu aproveita ba iha lezada nia uma tama liu ba lezada nia kuartu laran, arguidu kolu lezada nia kalsa no direktamente kaer, kokir no rei iha lezada nia orgaun seksuál, hotu tiha arguidu fó osan US\$2.00 ba lezada.

Iha 18 Jullu 2021 iha oras tuku 16:00 lokraik arguidu ko'alia ba lezada katak tama ba uma laran mak fó osan US\$2.00 maibé lezada rejete hodi ba tuur iha hadak leten nune'e arguidu ba tan lezada no rei kedas lezada nia hasan parte loos no karuk no lambe lezada nia vajina, hafoin testemuña Juleita Marcal kaer toman hodi hakilar dehan avo Juli labele halo hanesan ne'e ba labarik, hafoin arguidu para nia asaun refere.

Prokuradór akuza arguidu konkursu krime rua kontra artigu 177 (2) KP kona-ba abuzu seksuál ba menór ho nia moldura penál tinan 5 to'o tinan 15.

Produsaun ba provas sira.

Iha produsaun prova arguidu deklara katak faktu seluk ne'e loos hotu maibé kona-ba kokir mak arguidu la kokir, arguidu apenas kaer deit iha leten, deklara tan katak sira nu'udar viziñu no antes-antes lezada husu hela de'it osan ba arguidu ne'e mak arguidu hanoin to'o halo hanesan ne'e, arguidu sente sala no arrepende ninia hahalok, foin primeiravés mai hatan iha tribunál arguidu nu'udar agrikultór rezultadu hodi sustenta de'it ba família.

Entretantu lezadu konfirma faktu balun iha akuzasaun no faktu seluk hanesan arguidu la kokir lezada nia vajina maibé kaer de'it iha leten, lezada sente moe ba nia maluk seluk.

Alegasaun finál

Prokuradór iha nia Alegasaun, indisiu sufisinte katak arguidu komete konkursu krime rua hasoru lezada, lezada menór no antes arguidu mós sempre fó osan ba lezada, arguidu nia hahalok ne'e afeita ba lezada sentimentu moe no tauk iha sosiedade. Tanba ne'e husu ba tribunál atu kondena arguidu ba pena prizaun tinan lima ba arguidu no kondena mós arguidu selu indiminizaun sivíl ba lezada ho valor US\$2000.00

Enkuantu defeza haktuir katak iha produsaun prova arguidu konfesa, koopera ho tribunál hodi fasil deskoverta verdade, arrepende ninia hahalok, foin primeiravés mai hatan iha tribunál. Tanba ne'e husu ba tribunál atu aplika pena mínimu husi krime ne'e ba arguidu. Kona-ba indeminizasaun sivíl husu tribunál haree arguidu nia kondisaun henesan idade ona no la halo ona serbisu ruma.

Desizaun

Depoisde avalia faktu hotu, tribunál prova katak arguidu komete krime abuzu seksuál ba menór hamutuk rua, fulan Jullu 2020 arguidu tama liu ba lezada nia kuartu laran arguidu kolu lezada nia kalsa no direktamente kaer lezada nia orgaun seksuál, hotu tiha arguidu fóhela osan US\$2.00 ba lezada. Iha 18 Jullu 2021 iha oras tuku 16:00 lokraik arguidu koalia ba lezada katak tama ba uma laran mak fo osan US\$2.00 maibé lezada rejenta hodi ba tuur iha hadak leten nune'e arguidu mak ba tan lezada hodi rei lezada nia hasan parte loos no karuk no lambe lezada nia orgaun seksuál, hafoin Sra. Juleita Marcal haree no hakilar avo Juli labele halo hanesan ne'e ba labarik hafoin arguidu para nia asaun refere.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ba kada krime tinan neen, tribunal halo komula juridiku hodi kondena arguidu ba pena prizaun tinan hitu no kondena mos arguidu hodi selu indeminzasaun sivíl ba lezada ho osan valor US\$2000.00.

6. Krime ofensa ba integridade fízika simples ho natureza violénsia doméstika no ameasa

Nú. Prosesu : 0178/22. BCBCV
Kompozisaun Tribunál : Singulár
Juís : Dr. José António d. Escurial
Prokuradór : Dr. Julio da Silva Correia
Defeza : Dr. Germano Guterres Ramos
Desizaun : Pena multa US\$30.00 no Omologa, dezitensia keisa

Iha 16 Juñu 2023 Tribunál Judisiál Primeira Instánsia Baukau prezide julgamentu leitura sentensa ba kazu ofensa ba integridade fízika simples ho natureza violénsia doméstika ne'ebé envolve arguidu SF hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha, 05 Dezembru 2022 iha oras tuku 17:00 arguidu tebe dala barak iha lezada kelen parte karuk, tuku dala barak iha lezada nia kotuk laran no tuku dala ida iha lezada niaibun. Arguidu nia aktu ne'e rejulta lezada hetan moras no bubu iha fatin atinjidu sira no ameasa atu oho lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa kónjuga ho artigu 2, 3, 35 nú 36 LKVD no kontra artigu 157 KP kona-ba ameasa ho moldura penál to'o tinan 1 ka multa.

Antes tama ba produsaun ba prova sira, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu ho lezada, relasiona ho krime ameasa hasoru lezada tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun, lezada hakarak deziste nia keixa hasoru arguidu. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime ofensa ba integridade fízika simples ho natureza violénsia doméstika, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu deklara katak problema ne'e mosu tanba arguidu fila husi rega modo no sente hamlaha nune'e han hotu tiha modo ne'e mak lezada koalia barak halo arguidu hirus ne'e mak halo agresaun hasoru lezada tuir faktu iha akuzasaun. Depoizde akontese di'ak malu kedas, arrepnede ninia hahalok, forma família iha tinan 2004 iha oan hamutuk nain neen foin primeiravés baku lezada depoizde akontese la baku ona lezada no arguidu nu'udar agrikultór rezultadu hodi sustenta de'it ba família.

Alende ne'e, lezada konfirma faktu sira hotu iha akuzasaun no hatutan tan katak akontese lezada ba hato'o keisa iha xefe aldeia hafoin xefe aldeia kontaktu Polísia, lezada mós hela iha uma Mahon Baukau durante semana ida foin fila ba uma no di'ak malu perante família rua no la baku ona lezada to'o agora

Alegasaun finál

Prokuradór haktuir katak iha produsaun prova arguidu konfesa faktu hotu iha akuzasaun, lezada konfirma faktu hotu iha akuzasaun, mezmu sira di'ak malu ona maibé nafatin atu evita no prevene arguidu nia hahalok iha futuru. Tanba ne'e husu ba tribunál kondena arguidu ba pena prizaun fulan rua suspende ba tinan ida.

Enkuantu defeza haktuir katak bazeia ba produsaun prova parte defeza husu ba tribunál fó pena maiz adekua ba arguidu.

Desizaun

Depoide avalia faktu hotu, tribunál prova katak arguidu tebe dala barak iha lezada nia kelen parte karuk, tuku dala barak iha lezada nia kotuk laran no tuku dala ida iha lezada nia ibun.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, di'ak malu ona, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada laron durante laron 30. Tribunál mós fiksa pena alternativa ba arguidu durante laron 20 prizaun, bainhira arguidu la kumpri pena multa refere.

7. Krime ofensa ba integridade fizika simples ho natureza violénsia doméstika.

Nú. Prosesu	: 0191/22.BCBCV
Kompozisaun Tribunál	: Singular
Juís	: Dr. José Q.S. Celestino
Prokuradór	: Dr. Julio da Silva Correia
Defeza	: Dr. Antonio Fernandes
Desizaun	: Pena multa US\$30.00

Iha 26 Juñu 2023 Tribunál Junisial premeira instánsia Baukau preside julgamentu leitura sentensa ba kazu ofensa integridade fizika simples ho natureza violénsia doméstika ne'ebé envolve arguidu RREdC hasoru nia feen, iha Munisípiu Baukau.

Akuzasaun prokuradór

Prokuradór akuza katak iha Outubru 2019 arguidu basa dala rua iha lezada nia hasan parte karuk, halo moras. Iha 19 Dezembru 2022 iha oras tuku 10:14 arguidu buti dala rua iha lezada nia kakorok halo kanek tanba liman kukun kona lezada nia kakorok. Antes ne'e lezada husu *sim kard* mak arguidu hirus halo agresau hasoru lezada.

Prokuradór akuza arguidu konkursu krime kontra artigu 145 KP kona-ba ofensa ba integridade fizika simples ho nia moldura penál to'o tinan 3 ka multa kónjuga ho artigu 2(a), 3(b), 35(b) LKVD.

Produsaun ba provas sira

Iha prosesu julgamentu arguidu deklara katak faktu sira iha akuzasaun ne'e loos hotu, iha 2019 basa dala ida tanba de'it lezada deskonfia arguidu ba feto seluk ne'e mak arguidu nervosu hodi basa lezada no iha 2022 arguidu buti lezada iha kakorok tanba de'it husu sim kard nune'e agora sira di'ak malu fali ona no moris hamutuk fali ona hanesan feen ho la'en no arguidu promete ba iha tribunál sei la halo tán ona hahalok hanesan hasoru lezada.

Alende ne'e lezada kontinua konfirma faktu no montivasaun iha akuzasaun hotu ne'ebé akontese iha Outubru 2019 no 19 Dezembru 2022. depoisde akontese ikus sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak iha produsaun prova arguidu no lezada konfirma faktu hotu iha akuzasaun, arguidu nia hahalok ne'e priense duni krime ho natureza violénsia doméstika atu prevene arguidu nia hahalok futuru. Husu ba tribunál atu kondena arguidu ho pena únika tinan ida suspende ba tinan ida.

Entretantu defeza akresenta katak arguidu konfesa faktu iha akuzasaun sein rezerva no sira moris hamutuk kleur foin primeiravés halo agresaun hasoru lezada, depoisde akontese arguidu tenta nafatin atu di'ak malu maibé lezada mak lakohi, arrepende ninia hahalok. Tanba ne'e husu ba tribunál atu fó pena justu ba arguidu.

Desizaun

Depoisde avalia faktu hotu, tribunál prova katak fulan Outubru 2019 arguidu basa dala rua iha lezada nia hasan parte karuk, halo moras. Iha segunda feira 19 fulan Dezembru 2022 iha oras tuku 10:14 arguidu buti dala rua iha lezada nia kakorok halo kanek tanba liman kukun kona lezada nia kakorok.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, di'ak malu ona, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu sentavus 0.50 kada loron durante loron 60. Tribunál mós fiksa pena alternativa ba arguidu durante loron 40 prizaun, bainhira arguidu la kumpri pena multa refere.

8. Krime ofensa ba integridade ba fízika simples ho natureza violénsia doméstika

Nú. Prosesu	: 0006/23.BCLGA
Kompozisaun Tribunál	: Singulár
Juís	: Dra. Maria Modesta d. A. Viera
Prokuradór	: Dr. Ambrosio Rangel Freitas
Defeza	: Dr. Albino de Jesus Pereira
Desizaun	: Pena multa US\$45.00

Iha 26 Juñu 2023, Tribunál Judisiál Primeira Instánsia Baukau prezide julgamentu leitura sentensa kazu ofensa ba integridade ba fízika simples ho natureza violénsia doméstika ne'ebé envolve arguidu NPdC hasoru nia feen, iha Munisípiu Baukau.

Akuzasaun prokuradór

Prokuradór akuza katak iha 13 Maiu 2023 iha oras tuku 11:45 sira la'o hamutuk to'o dalan klaran derepente arguidu hadau no lés tiha lezada nia dokumentu deklarasaun suku nian ne'ebé mak atu halo sertidaun RDTL, momentu ne'e, arguidu tuku dala ida iha lezada nia hirus matan, tebe tan dala rua kotuk laran, tebe dala rua iha kelen parte loos halo lezada oin nakukun monu kedas ba iha rai hodi rezulta lezada nia ain kanek ki'ik. Arguidu lezada mós ba halo tratamentu iha sentru saude, maibé la aneksa ezaminasaun médiku.

Prokurador akuza arguidu kontra artigu 145 KP kona-ba ofensa ba integridade fizika simples ho moldura penal tinan 3 ka multa konjuga ho artigu 2, 3, 35(b) LKVD.

Produsaun ba prova sira

Iha prosesu julgamentu, arguidu deklara katak faktu sira ne'ebé akuza ba nia ne'e loos hotu, nia halo duni agregasaun fízika hasoru lezada, tanba antes ne'e lezada hateten sira nia oan moras, lezada la lori ba ospitál, maibé lezada bafoti fali deklarasaun, ne'e mak arguidu nervosu lés lezada nia deklarasaun ne'ebé lezada halo, depoisde akontese di'ak malu, arrepende ba ninia hahalok no foin primeiravés mai hatan iha tribunál.

Alende ne'e, lezada konfirma faktu hotu iha akuzasaun no deklara mós katak depoisde akontese liu loron rua sira di'ak malu ona, foin primeiravés arguidu baku lezada.

Alegasaun finál

Prokuradór alega katak arguidu konfesa integralmente, prokuradór haree katak krime ne'ebé arguidu pratika ne'e krime violénsia doméstika hasoru nia feen rasik. Tanba ne'e solisita ba tribunál atu kndena arguidu ba pena multa durante loron 90 kada loron arguidu selu 0.50 sentavus.

Enkuantu husi parte Defeza aseita ho prokuradór nia alegasaun hodi aplika pena multa ba arguidu, duarante loron 90 kada loronsentavus 0.50.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia hirus matan, tebe tan dala rua kotuk laran tebe dala rua iha kelen parte loos, halo lezada oin nakukun monu kedas ba iha rai hodi rezulta lezada nia ain kanek ki'ik.

Bazeia ba faktu provadu sira ne'e no tetu mós sirkunstánsia atenuante sira hanesan foin primeiravés mai hatan iha tribunál, di'ak malu ona, arrepende ninia hahalok nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu sentavus 0,50 kada loron durante loron 90. Tribunál mós fiksa pena alternativa ba arguidu durante loron 60 prizaun, bainhira arguidu la kumpri pena multa refere.

9. Krime hasoru flora no fauna

Nú. Prosesu : 0012/22. BCVMS
Kopozisaun Tribunál : Singulár
Juíz : Dra. Maria Modesta d. A. Viera
Prokuradór : Dr. Ambrosio Rangel Freitas
Defeza : Dr. Albino de Jesus Perreira
Desizaun : Pena multa ba kada arguidu US\$120.00

Iha 21 Juñu 2023 Tribunál Judisiál primeira Instánsia Baukau prezide julgamentu leituiria sentensa ba kazu hasoru flora no fauna ne'ebé envolve arguidu Helio Correia Rogrigues no Mizenia Freitas, hasoru Estado RDTL, iha Suku Vemasse Postu Administrativu Vemasse Munisipiu Baukau.

Akuzasaun Prokuradór

Prokuradór akuzasa katak 04 Outubru 2022 iha oras tuku 18:00 lokraik iha ponte Juís áreia Wailikama nia, arguidu Helio uza arguida Mizenia nia makina motorsera hodi tesi ai-nah, ai-sukar ne'ebé la iha lisensa tanba ai-nah ne'e flora protezida.

Prokuradór akuza arguidu kontra artigu 217 KP kona-ba hasoru flora no fauna kónjuga artigu 24 husi Lei n 14/2017 no artigu 30 ho 31 husi Dekretu Lei n 6/2020.

Produsaun Prova sira

Iha produsaun provas arguida Mizenia deklarata katak momentu iha nia uma mak arguidu Helio mai husu nia makina mortorsera atu tesi ai iha nia toos laran, bahira tesi hotu tiha mak arguidu Helio ba dehan atu foti ai iha toos, ne'e mak lezada ba haree ai-nah mos iha. Arguida antes faan ai-sunu no hetan ona informasaun husi Diresaun Florestal katak labele tesi ai bainhira la iha lisensa. Arrepende ba ninia hahalok no foin primeravés mai hatan iha tribunál.

Arguidu Helio deklarata katak faktu iha akuzasaun ne'e loos hotu, tesi ai iha ninia toos laran ho objetivu atu halo uma, arrepende ba ninia hahalok no foin primeiravés mai hatan iha tribunál.

Testemuña Pascoal Afonso Belo nu'udar responsavel florestál Munisípiu Baukau depoimentu katak, guarda Floresta halo duni apresaun ba ai-naa ne'ebé arguidu sira tesi, parte florestal agora sidauk iha sansaun administrasaun kona-ba multa ba komonidade

sira tesi-ai sein lisensa. Testemuña akresenta tan katak arguidu sira ne'e hetan ona informasaun husi Diresaun florestal tanba antes sira faan ai-sunu.

Alegasaun finál

Prokuradór haktuir katak iha produsaun prova arguidu konfesa ba faktu sein rezerva, katak arguidu sira tesi ai la iha lisensa no antes mós arguidu sira rona informasaun husi diresaun florestal katak tesi ai tenki iha lisensa husi florestal amibe arguidu la halo ida ne'e. Tanba ne'e husu ba tribunál atu kondena arguidu kada arguidu pena multa loraun 120 kada loraun selu US\$1.00.

Enkuantu defeza haktuir katak bazeiba produsaun prova arguidu sira konfesa faktu hotu, nu'udar komonidade antes sira moris faan ai hodi sustenta sira nia moris to'o agora, arrepende ba sira ninia hahalok, parte defeza husu ba tribunál atu aplika pena ademostsaun ba arguidu sira.

Desizaun

Depoizde avalia faktu sira hotu, tribunál prova katak 04 Outubru 2022 iha oras tuku 18:00 loraik iha ponte Juís areia Wailikama nia, arguidu Helio uza arguida Mizenia nia makina motorsera hodi tesi ai-nah, ai-sukar ne'ebé la iha lisensa tanba ai-naa ne'e flora protezida.

Bazeia ba faktu provadu sira ne'e no tetu mós sirkunstánsia atenuante sira hanesan foin primeiravés mai hatan iha tribunál, arrepende sira ninia hahalok nune'e tribunál konklui prosesu ne'e no kondena arguidu sira ho pena multa ba kada arguidu US\$120.00 ne'ebé kada arguidu sei selu US\$1.00 kada loraun durante loraun 120.00. total pena multa ne'ebé aplika ba arguidu nain rua hamutuk US\$240.00. Tribunál mós fiksa pena alternativa ba kada arguidu durante loraun 80 prizaun, bainhira arguidu la kumpri pena multa refere.

10. Krime violasaun seksuál

Nú. Prosesu	: 0108/22.BCBCV
Kopozisaun Tribunál	: Koletivu
Juís	: Dr. José António d. Escurial, Jumyati Maria Freitas no Dr. José Q.S. Celestino
Prokuradór	: Dr. Ambrosio Rangel Freitas
Defeza	: Dr. Horta Ramos, Dr. Grigorio De Oliveira Ximenes (Advogadu Privadu)
Desizaun	: Pena prizaun tinan 8 ba arguidu AdCB no pena prizaun tinan 6 ba arguidu AAdC

Iha 28 Juñu 2023 Tribunál Judisiál primeira Instánsia Baukau prezide julgamentu leitura akordaun ba krime violasaun seksuál, ne'ebé envolve arguidu AdCB no arguidu AAdC, hasoru Lezada IS, Munisípiu Baukau .

Akuzasaun Prokuradór

Prokuradór akuzasa katak iha 15 Janeiru 2022 iha oras tuku 22:00 kalan, eis edifisiu ospital iha área Diwake nia sorin lezada habai hela nia maun nia rounpa iha uma kotuk hafoin arguidu AdCB bolu lezada dala rua katak *ó mai lai* maibé lezada lakohi, ne'e mak arguidu ba rasta lezada nia liman ba iha eis edifisiu ospital nia kotuk kolu sai lezada nia kalsa, kamizola ho sutian hafoin arguidu uza kamera telemovel nian hodi hasai lezada nia fotografia ho kondisaun molik parte hirus matan no susun rua. Arguidu hahú kolu nia rounpa no kolu tan lezada nia rounpa halo lezada molik, hafoin arguidu haruka lezada toba iha rai maibé lezada rejeita ne'e mak arguidu ameasa lezada katak *se ó lakohi hau posting ó nia foto iha facebook tau ó nia naran hela fatin para ema hatene hotu ó nia hahalok jeitu aat ne'e*, tanba tauk lezada halo tuir arguidu nia ko'alia hodi toba iha rai no arguidu halo relasaun seksual to'o ejakulasaun iha liur. termina relasaun seksual arguidu haruka lezada hatais nia rounpa no haruka lezada ba nia uma no lezada mos la fo hatene nai inan-aman tanba tauk.

Loron no fulan haluha maibé iha tinan 2022 iha oras tuku 23:00 kalan lezada ba sosa sigaru iha kioske no fila husi kioske atu ba nia uma iha dalan arguidu AdCB hamrik iha nakukun laran rasta lezada nia liman dada ba iha eskola primaria nú.2 Diwake nia okos, arguidu kolu kedas lezada nia rounpa no arguidu mos kolu nia rounpa hodi hatoba lezada iha rai leten, arguidu kontinua halo relasaun seksuál to'o ejakulasaun iha liur. Depois lezada hatais fali nia rounpa no lezada atu ba uma mak arguidu buti tan lezada nia hirus matan sorin karuk no sorin loos.

Iha 15 Jullu 2022 iha oras tuku 21:00 lezada nia inan haruka lezada ba loke ahi eletrisidade iha eskola, mak rona arguidu AAdC hamri'ik iha nakukun laran bolu lezada maibé lezada lakohi atende mak arguidu la'o tuir hosi kotuk hodi rasta lezada nia jaket hosi kotuk, lori lezada ba iha haris fatin kotuk, haruka lezada tuur iha arguidu nia kelen maibé lezada rejeita no halo reajen atu ses-an husi arguidu. Bainhira lezada atu halai hases-an, arguidu koalio hodi amesa lezada katak *ó nia foto imi rua Adelino nian ne'e, hau sei hatudu ba ema seluk*, nune'e lezada tauk arguidu komesa hakbesik-an hodi rasta lezada ba hatoba iha fatuk boot ida nia leten arguidu hasai nia rounpa, arguidu mós hasai lezada nia rounpa, hatoba lezada kontinua relsaun seksuál to'o ejakulasaun iha liur. Termina relasaun seksuál arguidu hameno hela ba lezada katak iha buat ruma labele temi hau nia naran hafoin lezada hatais nia rounpa hodi fila ba uma.

Prokuradór akuzas arguidu arguidu AdCB Prátika krime rua ne'ebé kontra artigu 172 KP kona-ba violasaun no artigu 173 nú 1 (d) KP kona-ba agravasaun no arguidu AAdC ne'ebé kontra artigu 172 KP kona-ba violasaun no artigu 173 nú 1 (d) KP kona-ba agravasaun

Produsaun prova sira

Iha prosesu julgamentu arguidu AdCB deklarata katak iha 15 Janieru 2022 iha oras tuku 22:00 lezada mak bolu arguidu dehan atu fó osan US\$1.00 maibé arguidu tauk lezada nia inan-aman, lezada dehan fali ba arguidu katak orsida mak hasoru malu fali hau fo osan US\$2.00 bainhira sira hasoru malu fali nafatin iha kalan ne'e sira komesa halo

relasaun seksuál tanba sira namora liu loron haat ona. Depoisde halo relasaun seksuál lezada fo de'it osan US\$1.00 hatutan tan katak sir aida-idak hasai nia rounpa, arguidu mós la hasai lezada nia foto no la ameasa lezada atu posting nia foto.

Iha fulan Marsu 2022 iha oras tuku 22:00 kalan arguidu Adelino ba iha kioske mak hetan malu ho lezada mak lezada dehan atu fo osan US\$10.00 bainhira termina tiha relsaun seksual lezada la fo osan ba arguidu. Liu fulan tolu ka haat lezada isin rua temi hotu arguidu Alvaro nia naran ne'e mak arguidu diside para tiha sira nia relasaun namora.

Arguidu AAdC deklara katak iha 08 Janeiru 2022 ha'hu namora ho lezada liu semana tolu, loron, fulan haluha maibe 2022 manda mensajen ba malu liu husi *facebook* promete katak iha oras tuku 20:00 kalan sira hasoru. Momentu ne'e lezada mak hein uluk iha fatin refere bainhira arguidu to'o sira komesa hakuak malu, lamas malu kontinua halo rekasaun seksuál to'o ejakulasaun. Lezada husu tan arguidu atu halo tan relasaun seksuál ba dala rua mak arguidu hatan *hau forsa la iha ona*. Arguidu mos hameno hela ba lezada katak kuandu isin rua arguidu prontu responsabilidade. Liu fulan rua lezada dehan isin rua ona ne'e mak família arguidu no família lezada tuur hamutuk resolve mak lezada temi arguidu AdCB nia naran ne'e mak arguidu la simu. Hatutan tan katak iha relasaun seksual ne'e arguidu la ameasa kona-ba posting lezada nai foto.

Alende ne'e lezada deklara katak iha 15 Janeiru 2022 kalan lezada habai hela nia maun nia rounpa, arguidu AdCB bolu lezada maibé lezada rejeita arguidu emidiata rasta lezada ba iha ospital kotuk hasai lezada nia rounpa foin arguidu hasai lezada nia foto parte susun ho hirus matan hafoin arguidu hasai lezada nia rounpa inklui arguidu. Lezada rejeita maibé arguidu ameasa lezada dehan atu posting lezada nia foto ne'e mak lezada tauk to'o arguidu halo relasaun seksuál ho lezada. Lezada la iha relasaun namorada ho arguidu.

Iha Maiu 2022 lezada ba sosa pai nia sigaru derepente arguidu AdCB hamrik iha nakukun laran emidiata kaer lezada nia liman dada ba iha eskola nia kotuk hodi halo relasaun seksuál. Lezada la keisa tanba tauk arguidu atu posting nia foto.

Loron haluha, iha Maiu 2022 lezada nia inan haruka lezada ba loke ahi eletrisiadade iha eskola mak arguidu bolu lezada nune'e lezada hatan atu halo saida? Derepente arguidu AAdC ba rasta lezada nia liman ba iha fatuk belar leten, arguidu haruka lezada tuur iha arguidu nia kelen leet maibé lezada lakohi ne'e mak arguidu ameasa dehan atu posting nia foto ne'ebé antes arguidu AdCB hasai ne'e mak lezada tauk arguidu halo kedas relasaun seksuál ho lezada. Lezada la iha relasaun namorada ho arguidu no la manda menjasen ba arguidu no lezada mós la iha telemovel. Momentu akontese lezada ho idade tinan 15.

Alegasaun finál

Prokuradór haktuir katak iha produsaun prova arguidu nain rua konfesa katak halo relasaun seksuál ho lezada no lezada konfirma faktu iha akuzasaun sein rezerva no lezada mós deklara katak arguidu sira antes halo relasaun seksuál sempre ameasa

lezada kona-ba posting lezada nia foto ne'ebé antes arguidu AdCB hasai. Lezada idade kiik arguidu sira uza meuz oi-oin hodi halo relasaun seksuál ho lezada. Prokuradór intende katak arguidu AdCB provadu komete krime rua hasoru lezada tanba ne'e husu ba tribunál kondena arguidu AdCB ba pena prizaun tinan sanulu resin lima no kondena arguidu AAdC ba pena prizaun tinan sanulu.

Enkuantu defeza haktuir katak bazei ba produsaun prova katak arguidu AdCB ho lezada iha relasaun namorada nune'e akontese primeiru antes halo relasaun lezada atu fo osan US\$2.00 maibé relasaun seksuál termina tiha lezada fo de'it osan US\$1.00 ba arguidu, akontese sigundu antes halo relasaun seksual lezada promete fo osan US10.00 maibé relasaun seksuál termina lezada la fo osan refere ba arguidu. Arguidu Alvaro mos iha relasaun namorada ho lezada mak sira halo relasaun seksuál ho konsientemente. Bazeia ba arguidu sira nia deklarasaun iha produsaun prova, husu ba tribunál atu absolve arguidu nain rua husi prosesu.

Desizaun

Depoisde avalia faktu sira hotu, tribunál prova katak tau kribilidae ba lezada nia deklarasaun ne'ebé konfirma totalmente faktu hotu iha akuzasaun katak aktu seksuál ne'e akontese no arguidu sira halo relasaun seksual ne'e ho karakter ameasa atu posting lezada nia foto iha facebook.

Bazeia ba faktu provadu sira ne'e no tetu mós sirkunstánsia atenuante sira hanesan arguidu sira foin primeiravés mai hatan iha tribunál, nune'e tribunál konklui prosesu ne'e no kondena arguidu AdCB ho pena únika tinan ualu no kondena arguidu AAdC ho pena prizaun tinan neen.

11. Krime maus-tratus ba kónjuje

Nú. Prosesu	: 0009/22. VQVQQ
Kompozisaun Tribunál	: Koletivu
Juís	: Dra. Sribuana da Costa, Dra. Maria Modesta d. A. Viera no Dr. Evangelino Belo
Prokuradór	: Dr. Julio da Silva Correia
Defeza	: Dra. Laura Valente Lay
Desizaun	: Pena prizaun tinan 2 suspende ba tinan 2

Iha 28 Juñu 2023, Tribunál Judisiál Primeira Instánsia Baukau prezide julgamentu leitura akordaun ba kazu maus-tratus ba kónjuje ne'ebé envolve arguidu NBS hasoru nia feen, iha Munispíu Vikeke.

Akuzasaun prokuradór

Prokuradór akuza katak iha 25 Fevreiru 2022, iha oras tuku 08:00 kalan, arguidu mai ho kondisaun lanu nune'e lezada husu arguidu sosa labarik nia susbe ga lae? Tanba arguidu

la hola labarik nia susu ben nune'e mosu diskusaun arguidu tuku dala haat iha lezada nia rein tos, tuku dala rua iha kanuruk rezulta lezada monu ba rai bainhira lezada hamrik fali arguidu tuku tan dala ida iha lezada nia tilun hun parte loos. Loron no fulan haluha maibe iha tinan 2020 arguidu basa dala rua iha lezada nia hasan parte loos no karuk. Loron no fulan haluha maibe iha tinan 2021 arguidu tuku dala rua iha lezada nia hasan parte loos no karuk

Prokuradór akuza arguidu kontra artigu 154 KP kona-ba krime maus-tratus ba konjuje ho nia moldura penal tinan 2 too tinan 6 no konjuga ho artigu 2, 3, 35 no artigu 36 LKVD.

Produsaun ba prova sira

Durante julgamentu arguidu deklara katak akontese iha 25 Fevreiru 2022 iha oras tuku 08:00 kalan, arguidu fila mai uma ho kondisaun lanu no mosu diskusaun, to'o halo arguidu nervozu tuku dala rua iha lezada nia rein tos, tuku dala rua iha kanuruk no lezada konsege monu, bainhira hamrik arguidu la halo ona agresan, lezada la ba hato'o keisa maibe ema seluk mak hato'o keisa. Iha tinan 2020 arguidu basa dala rua iha lezada hasan parte loos no karuk no uza ai-sanak baku iha lezada nia ain no iha tinan 2021 arguidu tuku dala ida iha kanuruk no basa dala ida iha tilun hun. Motivun tanba bainhira arguidu fila husi serbisu lezada sempre ko'alia barak.

Alende ne'e lezada deklara katak iha 25 Fevreiru 2022 iha tuku 08:00 arguidu basa dala rua iha hasan parte loos no karuk, tuku dala ida iha kanuruk, tuku dala rua iha rein tos, rezulta lezada monu ba rai, hamrik ba hato'o keisa iha Polisia maibe la konsege to'o eskuadra Polisia, to'o de'it iha dalan klaran fila fali mai uma, hafoin ema seluk mak ba keisa fali. Akontese iha tinan 2020 arguidu basa dala rua iha hasan no uza ai-sanak baku dala ida iha lezada nia ain noiha tinan 2021 arguidu tuku dala ida iha kanuruk no basa dala ida iha tilun hun motivun akontese hanesan. Antes ne'e arguidu ho kondisaun lanu fila ba uma no diskute malu ho lezada tanba arguidu la soda lori susu ben ba labarik, arguidu nerbosu no halo agresan hasoru lezada.

Alegasaun finál

Prokurador konsidera faktu sira akuzasaun provadu tanba arguidu halo tratamentu kruel/aat hasoru lezada nu'udar nia feen, atu preve arguidu nia hahalok iha futuru hodi arguidu labele repete tan ninia hahalok hasoru lezada ka membru familia. Tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Aleinde ne'e parte defeza haktuir katak, bezeia ba produsaun prova, arguidu konfesa, arrepende ba ninia hahalok, di'ak malu ona ho lezada no foin primeiraves mai hatan iha tribunál. Tanba hus ba tribunál fopena ne'ebé justu ba arguidu.

Desizaun

Depoisde avalia faktu sira hotu, tribunál prova katak iha 25 Fevreiru 2022 iha tuku 08:00 kalan basa dala rua iha hasan parte loos no karuk, tuku dala ida iha kanuruk, tuku dala rua iha ren-toos

iha tinan 2020 arguidu basa dala rua iha hasan no uza ai-sanak baku iha ain, iha tinan 2021 arguidu tuku dala ida iha kanuruk no basa dala ida iha tilun hun.

Bazeia ba faktu provadu sira ne'e no tetu mós sirkunstánsia atenuante sira hanesan foin primeiravés mai hatan iha tribunál, di'ak malu ona, arrepende ninia hahalok nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl